

景明刻本鹽邑志林

三五

聖門志卷之一 中

海鹽呂元善纂輯

無錫高攀龍

參考

金壇段

鏞

兄呂元美

編次

侄呂濬

男呂兆祥

孫呂逢時

訂閱

四配列傳

按唐太宗貞觀二年詔顏子稱先師配享先聖

孔子宋神宗元豐七年五月壬戌詔孟子配享
於右以對顏子是時新經盛行以王安石爲聖
人沒而躋之配享位顏子下故左則顏子及安
石右則孟子未幾安石婿蔡卞當國謂安石不
當在孟子下遷安石於右與顏子對移孟子第
三次顏子之下遂左列顏孟右列安石又未幾
卞再欲升安石壓顏子漸次而升爲代先聖張
本優人有以藝諫者設一大言之士戲簿先聖
顏子出爭之不勝子貢出爭之不勝子路出而
盛氣爭之又不勝然後設爲公冶長有擊其首

而叱之曰汝何不出一爭且看他人家婿蓋蔡
卞安石婿而公治長先聖婿也卞聞之遂不敢
進安石於顏子上顏孟左而安石右遂爲定制
高宗南渡後安石罷配享宜遷孟子以對顏子
如舊制議者失於討論故安石旣去其右遂虛
而顏孟並列於左孝宗時洪邁嘗謂孟子配食
與顏子並而其師子思子思之師曾子皆在其
下於禮儀實爲未然至度宗咸淳三年始升曾
子子思並配享位在孟子上

國朝嘉靖九年考正祀典以顏思居左曾孟居右

永為定制

東配

顏回

山東兗州府曲阜縣人

孔伋

山東兗州府曲阜縣人

西配

曾參

山東兗州府嘉祥縣人

孟軻

山東兗州府鄒縣人

高宗南郊郊禘于廟宜聖孟子以權節于
進交亦於賦于... 孟孟孟而交亦... 為安...
才交亦散而公... 身代聖散也... 不...
而... 之... 曰... 所... 不... 出... 一... 年... 且... 香... 州... 人... 者... 散... 蓋... 蔡...

復聖顏子

顏回字子淵山東兗州府曲阜縣人少孔子三十歲天資明睿聞一知十甫成童卽從遊於孔門孔子曰自吾有回而門人日益親嘗謂回曰家貧居卑胡不仕乎對曰回有郭外之田五十畝足以給饘粥郭內之田十畝足以爲線麻鼓瑟足以自娛所學於夫子者足以自樂回不願仕也回願貧如富賤如貴無勇而威與士交通終身無患難亦且可乎孔子曰善哉回也夫貧而如富其知足而無欲也賤而如貴其讓而有禮也無勇而威其恭敬

而不失於人也終身無患難其擇言而出之也若
回者其至乎孔子北遊於農山子路子貢顏淵侍
孔子曰二三子各言爾志吾將擇焉子路進曰由
願得鐘鼓之音上震於天旌旗繽紛下蟠於地由
當一隊而敵之必也攘地千里塞旗執馘唯由能
之夫子曰勇哉子貢復進曰賜願使齊楚合戰於
澠澆之野兩壘相望挺刃交兵賜着縞衣素冠陳
說其間推論利害釋二國之患唯賜能之夫子曰
辯哉顏回退而不言孔子曰回汝獨無願乎對曰
回聞薰蕕不同器而藏堯桀不共國而治以其類

異也回願得明王聖主輔相之敷其五教導之以
禮樂使民城郭不修溝池不越鑄劍戟以爲農器
放牛馬於原藪室家無離曠之憂千歲無戰鬪之
患則由無所施其勇而賜無所用其辯矣夫子凜
然曰美哉德也子路抗手而對曰夫子何選焉孔
子曰不傷財不害民不繁詞則顏氏之子有矣子
貢對衛將軍文子曰夙興夜寐諷誦崇禮行不貳
過稱言不苟顏回之行也若逢有德之君世受顯
命不失厥名以御於天子則王者之相也年二十
九髮盡白三十二而卒漢高帝十二年東巡狩過

聖門志 卷一
魯以太牢祀孔子以顏子配饗歷代因之唐太宗
貞觀二年詔稱先師配饗先聖孔子高宗總章元
年四月乙卯贈太子少師睿宗太極元年二月十
六日贈太子太師玄宗開元二十七年八月追贈
兗公宋真宗大中祥符二年五月進封兗國公元
文宗至順元年七月贈兗國復聖公
國朝嘉靖九年改稱復聖顏子

廟宇

復聖廟在曲阜縣孔廟東北三百餘步卽陋巷故
宅也巷北有井名曰顏井歷代顏族世守之宋神

宗熙寧間太守孔宗翰構亭其地命曰顏樂蘇軾
爲記歲久亭圯元成宗元貞間衍聖公孔治復命
顏族構于故基繚以周垣設兗國公像祀焉仁宗
延祐四年因南臺御史段傑請大修顏廟以亭爲
門文宗至順元年落成歐陽玄奉勅爲記

國朝洪武正統間相繼重修成化二十二年六十
一代孫博士顏公鉉請修大廓其規制弘治十五
年奉勅重修正德己巳落成英廟武廟各
有御製碑記廟制正殿七間復聖南向後爲寢殿
五間以祀夫人戴氏兩廡各七間左祀二代顏歆

及三十四代隋黃門侍郎顏之推四十代唐平原
大守顏真卿常山太守顏杲卿右祀三代顏儉及
三十三代北齊御史中丞顏見遠三十七代唐崇
文館學士顏師古中爲顏樂亭亭前爲仰聖門兩
旁各角門一座門前御製碑亭二座又前爲歸仁
門三間左掖爲克己門三間右掖爲復禮門三間
歸仁門稍西顏井在焉覆之以亭前爲復聖門三
間復聖門之外爲復聖廟坊又外更西二坊左曰
卓冠賢科右曰優入聖域又外里門有坊榜曰陋
巷萬曆二十二年山東巡按連標建從博士顏胤

祚所請也復聖門之內東爲博文門三間西爲約
禮門三間相射而立由左掖而入有齋宿房七楹
稍北有祭器庫五楹俱西向又北爲見進門門內
爲退省堂三間堂後爲家廟復聖二世三世神櫝
藏焉廟後爲神厨由右掖而入爲杞國公廟宗子
居第在廟左方祭用春秋仲月上丁日宗子博士
主祭

復聖祠在兗州府寧陽縣西四十里顏氏子孫有
居於此者元時因立祠以祀之仍復其家

國朝因之

聖門志 卷一中 六
林墓

復聖墓在曲阜縣城東二十里防山之陽有石刻
曰先師兗國公之墓其墓前一石鐫兩甲士背負
而坐一執斧一執金吾又一碑湮沒不存惟坐跌
在墓高丈餘林木森鬱其地廣袤各一百五尋有
五尺少東有村曰上宋有祀田六十畝歲收其租
以奉時祭顏林之西北爲侍郎林顏氏自晉唐以
來爲黃門中書侍郎及六部侍郎者前後凡十三
人皆葬於此故云其地周廻可二里餘顏氏之裔
祔焉墓祀春用清明冬用孟朔宗子博士主祭

宗聖曾子

曾參字子輿山東兗州府嘉祥縣人少孔子四十六歲年十六孔子在楚父命參之楚受學焉資質篤實力學純固故於聖人之道獨得其宗每侍孔子輒有所問凡吉凶軍國之禮經權常變之宜無不反覆窮究諸所問答語具大戴記家貧食力敝衣躬耕日不舉火而歌聲若出金石魯君聞之而致邑焉固辭不受曰吾聞受人施者常畏人與人者常驕人縱君有賜不我驕也吾豈能勿畏乎從孔子於齊齊景公以下卿之禮聘之辭曰吾親老

不忍遠遊而爲人役晚年道益尊子思公明儀之徒皆從受業及親沒始遊齊齊大夫資之以適楚每讀喪禮泣下沾襟曰往而不可還者親也至而不可用者年也初吾爲吏祿不及釜尚欣欣而喜者非以爲多也樂其逮親也親旣沒之後吾嘗南遊於楚得尊官焉猶北向而泣者非爲賤也悲不逮吾親也曾子寢疾樂正子春坐於牀下曾元曾申坐於足童子隅坐而執燭童子曰華而晄大夫之簣與子春日止曾子聞之瞿然曰斯季孫之賜也我未之能易也元起易簣曾元曰夫子之病革

矣不可以變幸而至於且請敬易之曾子曰爾之
愛我也不如彼君子之愛人也以德細人之愛人
也以姑息吾何求哉吾得正而斃焉斯已矣扶而
易之蓋反席未安而沒當其疾也謂子華曰吾無
顏氏之才何以告女雖然子不觀之飛鳥魚鱉乎
其得之於人者餌也苟能不貪於利害安得從生
是以君子慎始也著書十八篇十篇見大戴禮八
篇亾又作大學傳十章孔子以其志存孝道嘗因
之以作孝經十篇子貢對衛將軍文子曰滿而不
盈實而如虛過之如不及博無不學其貌恭其德

惇其於人也無所不信其驕大人也常以浩浩是
曾參之行也唐高宗總章元年二月十九日贈太
子少保從祀廟庭睿宗太極元年加贈太子太保
玄宗開元八年配享孔子二十七年追封郕伯宋
真宗大中祥符二年五月加封瑕丘侯徽宗政和
六年六月太常寺奏孔子高弟所封侯爵與先聖
名同失弟子尊師之禮改封武城侯度宗咸淳三
年正月加封郕國公元文宗至順元年閏七月戊
申加封郕國宗聖公

國朝嘉靖九年改稱宗聖曾子

廟宇

宗聖廟在嘉祥縣南四十五里南武山之陽初建
無考

國朝正統九年甲子教諭溫良以廟宇傾圮奏請
重修 詔山東叅議馬諒僉事蕭啓兗州府知府
焦福嘉祥縣知縣宋善修建祠宇翰林院學士許
彬爲記弘治十八年山東巡按金洪見其規制卑
陋疏請恢濶如顏孟制

孝宗皇帝可其奏命左布政使張泰僉事毛廣知
府趙繼爵計工料直督以府佐而知縣齊雲鄭瑾

聖門志 卷一
相繼綜理金錢出自藩司力役坐之鄰境閱七年而事竣宏敞壯麗僅亞孔廟嘉隆之末廟復圯壞萬曆七年六十二代孫博士曾承業復奏修葺

詔山東巡撫趙賢巡按錢岱叅議查志立僉事詹沂下檄所司出帑金一撒其廟而新之經始於己卯之九月告成於本年之十一月其制正殿七間中設宗聖像東配子思子西配孟子東廡五間以陽膚公明儀公明高公明宣孟儀從祀西廡五間以樂正子春沈猶行單居離公孟子高子襄從祀寢殿五間正殿之前爲戟門三間戟門之外東西

齋房各三間神厨神庫東西共六間前爲御製碑亭一座宗聖門三間石坊三座中曰宗聖廟東曰三省自治西曰一貫心傳入宗聖門迤東與戟門並者曰三省門門內爲三省堂三間寢堂三間庖厨三間春秋祭享宗子博士主祭

宗聖祠在兗州府沂州城南五里中祀曾子以子曾元曾申曾華孫曾西門人公明儀公明高公明宣樂正子春陽膚子襄沈猶行祔享別室爲毓賢祠以奉其先子哲知州何格有記

一貫書院在兗州府郟城縣西六十里磨山元順

聖門志 卷一中
宗至正三年提舉管文通建

國朝成化四年知縣李楷移建縣治之西嘉靖二十三年知縣郎湘復移於北門之外以春秋二仲月致祭

曾子書院在嘉祥縣南四十里南武山之陽相傳爲曾子讀書處故立書院以祀今廢

墓林

宗聖墓在嘉祥縣南四十里南武山之西距舊武城五里
國朝成化初年山東守臣上言嘉祥縣南武山西

南玄寨山之東麓有漁者陷入一穴中得懸棺其
前有石竭鐫曾參之墓弘治十八年山東巡按金
洪奏請建饗堂三間東西齋房各三間中門一
座左右角門二座大門一座石坊一座扁曰宗聖
墓繚垣周峻茂林森陰嘉靖元年撫按移文每歲
清明委教職一員以羊一豕一致祭後因主祀得
人有司之祀遂止萬曆十七年禮部侍郎于慎行
奏給祭田三十頃歲收其租以奉時祭墓祀春用
清明冬用孟朔宗子博士主祭

山門之門蓋殿宗子廟士才宗

天祥祭田三十畝此外其田以未種不舉厥春用

六井而之卯後北海昏十水手節節有項于財口

南門外之廟以子一乘一姓祭於園主脈野

墓慈取佩地黃林在劍臺前太平時於外文拜地

聖式香真門二乘大門一乘不姓一聖曰宗聖

地本一書事樂堂二廟東西齋各三之間中門一

前存百龍池曾修之墓坂尚十八平山東溪封金

南之泰山之東戴有前香洲入一穴中封獵射其

述聖子思子

孔伋字子思伯魚之子也爲人剛毅好學夫子間居喟然而嘆子思再拜請曰意者子孫不修將忝祖父乎抑羨堯舜之道恨不及乎夫子曰孺子焉知吾志子思對曰伋聞夫子之教曰其父析薪其子弗克負荷伋聞之大恐而不懈也夫子欣然笑曰然乎吾無憂矣初夫子傳道曾子子思從曾子受業誠明道德有心傳焉乃述父師之意窮性命之原極天人之奧作中庸一書以詔來世魯繆公亟見於子思欲以爲國相子思嘆曰若爲相而不

聖門志 卷一 十一
得行吾道相之耻也遂不受穆公謂子思曰縣子
言子之爲善不欲人譽已信乎子思對曰非臣之
情也臣之修善欲人知之知之而譽臣是臣之爲
善有勸也此所願而不可得者也若臣之修善而
人莫知莫知則必毀臣是臣之爲善而受毀也此
臣所不願而不可避者也若夫鷄鳴爲善孜孜以
至夜半而曰不欲人知恐人之譽已臣以謂斯人
也者非虛則愚也穆公曰吾國可興乎子思曰可
苟君與大夫慕周公伯禽之治行其教化開公家
之惠杜私門之利結恩百姓修禮鄰國其興也勃

矣公曰善然不能用於是去魯之齊魯申問曰何以不仕子思曰道伸吾願也今天下諸侯其孰能哉與其屈已以富貴不如抗志而貧賤在衛貧甚而自若緼袍無裏三旬九食田子方遺以狐白裘恐其不受因謂曰吾假人遂忘之吾與人也如棄之子思辭焉曰伋聞之妄與不如遺於溝壑伋雖貧不忍以身爲溝壑也衛人釣於河得鰈魚子思問何以得之對曰吾釣垂一紡之餌鰈過而弗食益之以豚則吞之矣子思喟然曰鰈雖難得貪以死餌士雖懷道貪以死祿矣衛君問子思曰寡人

之政何如對曰無非君曰寡人不知其不肖亦望其如此也子思曰希旨容媚則君親之中正弼非則君疏之是故競求射君之心而莫敢有非君之非者此臣所謂無非也君曰然乎寡人之過也今知改矣子思反於魯謂子上曰有可以爲公侯之尊而富貴人衆不與焉者非唯志乎成其志者非唯無欲乎夫錦紛華所服不過溫體三牲太牢所食不過克腹知以身取節者則知足矣苟知足則不累其志矣胡毋謂子思曰子好大世莫能容子也盍亦隨時乎子思曰大非所病所病非大也凡

所以求容於世爲行道也毀道以求容容何行焉
吾弗改矣卒年六十有二自漢唐以來中庸一篇
列於禮記故子思之學不顯至宋表章大學中庸
與論語並列爲四書乃以徽宗崇寧元年封爲沂
水侯大觀二年從祀先聖端平二年詔以子思升
祀堂上列於十哲之間度宗咸淳三年加封沂國
公升配享元文宗至順元年加贈沂國述聖公
國朝嘉靖九年改稱述聖子思子

廟宇

子思書院在兗州府鄒縣南門外舊有子思講堂

相傳思孟授受於此後廢爲淫祠元成宗元貞間
縣尹司居敬以縣東南隅晒書臺東建祠榜曰中
庸請舍匾堂曰淵源實爲書院之始張頌爲記大
德六年縣尹宋彰始建講堂於淵源堂之後匾曰
率性堂又爲學官居室於其左齋舍厨庫翼爲東
西請於朝改名中庸書院仁宗延祐元年里人尚
書省照磨姜元捐貲置九經正義溫公全鑑於書
院御史劉太爲記縣尹劉遵理始買田一百八十
五畝七分爲書院學田延祐二年奉旨改中庸書
院爲子思書院設山長以司祭祀及教事延祐四

年縣尹曹彬買田二百九十七畝是後山長曹德輝卜習吉皆相繼買田計八頃十畝有奇文宗天曆二年山長孔思本復買田一頃八十九畝又請增子思春秋祭祀順宗至正四年縣尹鄧彥禮始改書院於今祠司業潘迪爲記明宗至正八年縣尹孔之威重修率性堂山長趙景濂爲記

國朝永樂七年知縣朱珪徙書院於曝書臺東與斷機祠相直正統二年知縣房岳修書院門墻自爲記六年復修書院太學士許彬爲記正德元年始以衍聖公次子世襲翰林院五經博士奉子思

聖門志 卷一 中 十五
子鄒縣廟祀嘉靖元年山東巡撫陳鳳梧重修四
十年曲阜縣丞胡潭攝鄒縣篆始修子思正殿寘
二石香爐焉四十一年知縣章時鸞大加修葺適
浙江巡撫趙炳然赴總督戎政之召過鄒遂捐俸
三十金以助之其率性堂中庸精舍遵舊制而修
葺者也曰修道堂慎獨齋中和堂皆推本中庸之
義而創立者也時鸞自爲記萬曆十年知縣許守
恩重修三十七年知縣胡繼先大加修葺建置大
門與孟毋子思二祠並列易堂名曰景賢壯麗特
甚豐城唐大章晉江張瑞圖俱爲之記每歲春秋

上丁致祭子思孟子皆羊一豕一以孟子配享故也至期孔氏博士赴鄒縣主祭

子思祠在鄒縣南門外其祠舊混在子思書院之內正德間乃崑置門於書院東萬曆三十七年知縣胡繼先重修

林墓

子思墓在曲阜縣北孔林先聖墓南相去數十步墓前有碑鐫沂國述聖公墓

皇朝新編... 國步... 聖公... 聖公...

... 林... 聖... 南... 殿... 十...

... 林... 聖... 南... 殿... 十...

... 林... 聖... 南... 殿... 十...

... 林... 聖... 南... 殿... 十...

... 林... 聖... 南... 殿... 十...

... 林... 聖... 南... 殿... 十...

... 林... 聖... 南... 殿... 十...

亞聖孟子

孟軻字子輿山東兗州府鄒縣人三歲喪父其母有賢德家貧以女工自給始舍近墓孟子之少也嬉戲爲墓間事踴躍築埋孟母曰此非所以居子也乃去舍市其嬉戲爲賈術事母曰又非所以居子也遂徙舍學宮之傍其嬉戲乃設俎豆揖讓進退母曰此真可以居子矣遂居之十五歲就學於魯歸家母方織問曰學何所至矣軻曰自若也母以刀斷織孟子懼問其故母曰子之廢學若吾斷斯織矣夫君子學以立名問以廣知是以居則安

寧動則遠害今而廢之是不免厮役而無以離於
禍患也何以異於織績而食中道廢而不爲寧能
衣其夫子而長不乏食哉孟子懼旦夕勤學遂成
名儒及道旣通遊事齊宣王宣王不能用適梁梁
惠王不果所言則見以爲迂遠而闕于事情當是
之時秦用商鞅富國強兵楚衛用吳起戰勝弱敵
齊威王宣王用孫子田忌之徒而諸侯東面朝齊
天下方務于合從連橫以攻伐爲賢而孟子乃述
唐虞三代之德是以所如者不合退而與萬章之
徒序詩書述仲尼之意作孟子七篇凡二百六十

一章三萬四千六百八十五字包羅天地揆叙萬類仁義道德性命禍福燦然靡所不載帝王公侯遵之則可以致隆平頌清廟卿大夫士蹈之則可以尊君父立忠信守志厲操者儀之則可以崇高節抗浮雲唐韓愈推其功以爲不在禹下者信不誣矣卒年八十有四宋仁宗元豐六年十月戊子封鄒國公立廟縣南郭七年五月壬戌詔配享孔子廟庭位次顏子元文宗至順二年九月加贈鄒國亞聖公

國朝洪武二年

太祖高皇帝覽孟子土芥寇讐謂非人臣之所宜
言詔去其配享有諫者以不敬論且命金吾射之
象山縣錢唐爲刑部尚書抗疏入諫輿襯自隨祖
胸受箭且曰臣得爲孟軻死死有餘榮

太祖覽其情詞剴切爲之感動遂復孟子祭仍命
太醫院療錢唐箭瘡焉嘉靖九年十月改稱亞聖
孟子

廟宇

亞聖廟在鄒縣城南道左宋仁宗景祐四年龍圖
學士孔道輔守兗州訪孟子墓得於鄒縣東三十

里四基山因於墓旁建廟立碑泰山孫復爲記徽
宗政和四年奉詔重修賜祭田百畝以給守者後
以距城遼遠徙建東門之外宣和四年縣令朱正
倡義重修邑士共出私錢二百餘萬復徙南門之
外重門夾戶壯麗閎偉規制大備矣金章宗泰和
甲戌燬於兵元成宗元貞元年進義副尉達魯花
赤木忽難從仕郎鄒縣尹司居敬主簿兼尉趙國
祥重修三氏教授張頌爲記文宗至順四年五十
二代孫孟惟恭邑人鹽山教諭李儼蓀縣教諭馬
亨始於廟西建致嚴堂助教陳繹曾爲記順帝至

聖門志 卷一中
元三年縣尹張銓重修鄭質爲記

國朝洪武四年山東僉事鄭本捐俸資修知縣桂
孟同宗子孟思諒勉爲締構力不足而功輟至洪
武七年落成濟寧知府台州方克勤序十年縣丞
胡景昇重修致嚴堂邑人郝勿學記二十三年知
縣馬總重修廟垣教諭黃琮記二十七年知縣趙
允昇重修教諭賴景衡記永樂三年知縣朱珪重
修教諭樂暉記洪熙元年知縣房岳重修兩廡及
致嚴堂三氏學教授張敏記正統八年知縣房岳
重修正殿教諭蘇潤記

房岳在鄒二十
餘年故再修廟

十一年縣

丞官政捐貲修致嚴堂教諭蘇潤記天順二年知縣劉巍重修訓導李達記成化四年山東巡按吳遠檄修兩廡儀門教諭周載記歷歲既久多所圯廢至弘治十年博士孟元奏請乃詔山東巡撫

熊翀大加修葺視舊益恢大學士劉健奉勅爲

記嘉靖四十一年知縣章時鸞重修僉都御史任瀛爲記萬曆十年知縣許守恩重修教諭徐明綱記二十四年山東巡按姚思仁知縣王一楨重修大學士于慎行爲記三十七年山東巡撫黃克縉巡按蕭淳巡鹽畢懋康左布政李同芳按察使徐

夢麟提學副使靳於中分守東兗道副使俞維宇
公巡兗西道副使盧夢麟兗州府知府葛錫璠知
縣胡繼先復大修之給事中戴章甫爲記其制正
殿七間孟子南向以利國侯樂正克配享寢殿五
間祀亞聖夫人東廡七間以壽光伯公孫丑東阿
伯浩生不害蓬萊伯陳臻奉符伯屋廬子沂水伯
陳代平陰伯公都子泗水伯高子萊陽伯益城括
承陽伯子叔疑昌黎伯韓愈從祀西廡七間以博
興伯萬章新泰伯孟仲子昌樂伯充虞仙源伯徐
辟雷澤伯彭更須成伯咸丘蒙膠水伯桃應豐陽

伯季孫宋司空孔道輔從祀殿前爲承聖門西向
前爲儀門三間又前爲櫺星門門左右爲二坊榜
曰繼往聖開來學廟左爲啓賢門門內爲邾國公
殿殿後爲宣獻夫人殿廟右爲致敬門門內爲致
嚴堂堂後爲孟氏家廟倉厨庫齋俱備如制宗子
博士居第在通衢之西與廟門對祭期與顏曾二
氏同焉按昌黎伯韓愈宋司空孔道輔乃
郡邑私祀非王命也故附於末

孟子廟在東昌府荏平縣東北孟家莊相傳孟子
游齊梁時經此後人因立廟祀之

林墓

孟子墓在鄒縣東北二十五里四基山之西麓宋
仁宗景祐四年龍圖學士孔道輔知兗州訪而得
之爲立廟於墓之西南徽宗政和四年奉詔重修
賜祭田百畝以給守者其後移廟於城墓廟改爲
墓祠元成宗元貞二年縣尹司居敬重修墓立碑
張頌爲記順宗至順三年墓祠毀族長孟惟讓於
墓前建思本堂德州鄭質爲記

國朝宣德九年魯府惠王重建墓祠國子學錄弋
陽李奎爲記嘉靖四十一年知縣章時鸞復建祠
廟仍置祭田五十畝且植柏數千餘株魯宗觀燧

爲記萬曆十四年知縣許守恩重修享堂賈三近
爲記三十五年知縣胡繼先重修墓復捐俸買祭
田三十五畝又搜出前令章時鸞所置田五十畝
歸其本族約爲三祭除春秋廟祭外祭以五月之
五日七月之望日九月之九日繼先自爲之記

聖門志卷之一中終

聖門志卷之一下

海鹽呂元善纂輯

懷寧何早

江陰繆昌期 參考

兄呂元美 編次

侄呂濬

男呂兆祥

訂閱

孫呂逢時

十哲列傳

按自唐以來孔門高弟顏淵至子夏為十哲坐

聖門志 卷一
祀於廟堂之上唐太宗貞觀二年升顏子配享
玄宗開元八年則進曾子於堂居子夏之次宋
真宗大中祥符二年升曾子配享度宗咸淳三
年則進子張於堂以補其闕

東配

閔

損

山東曲阜縣人

冉

雍

山東兗州府人

端木賜

河南衛輝府人

仲

由

山東泗水縣人

卜

商

河南溫縣人

西配

冉

耕

山東鄆城縣人

宰

子

山東曲阜縣人

冉

求

山東兗州府人

言

偃

南直常熟縣人

顓孫師

河南陳州人

先賢閔子

閔損字子騫山東兗州府曲阜縣人少孔子十五歲幼喪母爲後母所苦冬月以蘆花衣之以代絮其所生二子則衣之以綿閔子御父車身寒失轡父察知之欲出後母損曰母在一子單母去三子寒父善其言而止母爲感悟長以孝聞閔子始見於夫子有菜色後有芻豢之色子貢問曰子始有菜色今有芻豢之色何也閔子曰吾出蒹葭之中入夫子之門夫子內切磋以孝外爲之陳王法心竊樂之出見羽蓋龍旂裘旂相隨心又樂之二者

相攻胸中而不能決是以有菜色今被夫子之文
寢深又賴二三子切磋而進之內明於去就之義
出見羽蓋龍旂裘旃相隨視如壇土矣是以有芻
豢之色閔子不仕大夫不食汙君之祿季氏召爲
費宰弗往嘗問政於孔子得聞六轡六官之說具
在家語閔子居親三年喪畢見於孔子與之琴使
之弦切切而悲作而曰先王制禮不敢過焉孔子
曰閔子哀未盡能斷之以禮不亦君子乎夫子晝
息於室而鼓琴閔子聞之以告曾子曰鄉也夫子
之音清徹以和淪入至道今也更爲幽沉之音何

所感之若是乎二子入問孔子曰然吾有感於蒙
貴之哺食也閔子可與知音也已後孟嘗君請學
於閔子使車往迎之閔子曰禮有來學無往教致
師而學不能禮往教則不能化君也君所謂不能
學者也臣所謂不能化者也於是孟嘗曰敬聞命
矣明日祛衣請受業焉終身不仕避居青州府沂
水縣閔公山卒葬鸞山之南唐玄宗開元八年從
祀孔廟二十七年追贈費侯宋真宗大中祥符二
年加封瑯琊公度宗咸淳三年改封費公
國朝嘉靖九年改稱先賢閔子

閔子祠在青州府沂水縣西北八十里閔公山下
卽避季氏之處正德八年知縣汪淵改創書院
嘉靖十一年知縣李汝節以祠旁有子路讀書
臺因并祀之改名二賢祠

閔子書院在濟南府閔子墓前宋李滌陽守濟南
立蘇轍撰碑蘇軾書元時設山長今廢

閔子墓

有四

一在南直鳳陽府宿州北七十里一在

南直徐州蕭縣東南八十五里元時有贍墳地

按宿州蕭縣南北連界疑一墓而兩志之

一在山東濟南府歷城縣

治東五里一在山東東昌府范縣南四十里

先賢冉子

冉耕字伯牛山東兗州府鄆城縣人少孔子七歲以德行稱亞於顏閔尸子曰仲尼志意不立子路侍儀服不修公西華侍禮不習子游侍辭不辯宰我侍亡忽古今顏淵侍節小物冉伯牛侍子曰吾以六子自厲也孔子爲魯司寇以冉耕爲中都宰有惡疾孔子痛惜之唐玄宗開元二十七年從祀封鄆侯宋真宗大中祥符二年改封東平侯度宗咸淳三年加封鄆公

國朝嘉靖九年改稱先賢冉子

聖門志 卷一
冉伯牛廟在河南開封府杞縣北

冉伯牛祠在兗州府東平州西北十五里正統間
知州潘洪因歲久傾圮復鼎新之祠旁有祭田
三十畝有司春秋祭享大學士許彬知州劉元
凱俱有記

冉伯牛墓 有三

- 一在兗州府汶上縣西門感化橋側當時攝中
都宰卒因葬焉宋改葬東平州西北十五里
- 一在北直廣平府永年縣西北四十里
- 一在河南河南府孟津縣西舊清河城南

先賢冉子

冉雍字仲弓山東兗州府人伯牛之宗族少孔子二十九歲嘗問孔子曰雍聞至刑無所用政至政無所用刑至刑無所用政桀紂之世也至政無所用刑成康之世也信乎孔子曰聖人之治化也必刑政相參焉太上以德教民以禮齊之其次以政導民以刑禁之刑者成也一成而不可更故君子盡心焉子貢曰在貧如客使其臣如借不遷怒不深怨不錄舊罪是冉雍之行也唐玄宗開元二十七年從祀封薛侯宋真宗大中祥符二年封下邳

聖門志 卷一 五
公度宗咸淳三年加封薛公

國朝嘉靖九年改稱先賢冉子

仲弓祠 有二

一在兗州府曹縣東南冉堦村弘治辛酉知縣

鄒魯建萬曆間知縣錢達道重修

一在東昌府冠縣墓前景泰三年重修

仲弓墓 有二

一在曹縣東南五十里俗呼爲冉堦

一在冠縣北二十五里

先賢宰子

宰予字子我山東兗州府曲阜縣人長於言語嘗問五帝之德黃帝之年及鬼神祭祀孔子告之詳見家語又問君子尚辭乎孔子曰君子以理爲尚博而不要非所察也繁詞富說非所聽也惟知者不失禮嘗使於楚昭王問之宰予曰切見夫子道行則樂其治不行則樂其身今天下道德寢息志欲興而行之誠有欲治之君夫子固猶爲之何必遠辱君之貺他日歸以告夫子子貢曰予之言行事之實未盡夫子之美也夫子曰言貴實使人信

之舍實何稱賜之華不如予之實也又曰吾於予
取其言之近類也於賜取其言之切事也近類則
足以喻之切事則足以懼之仕齊爲臨淄大夫唐
玄宗開元二十七年從祀封齊侯宋真宗大中祥
符二年封臨淄公度宗咸淳三年改封齊公
國朝嘉靖九年改稱先賢宰子
宰我墓在曲阜縣西南三里

先賢宰子

先賢端木子

端木賜字子貢河南衛輝府人

或曰今北直大名府濬縣倪河驛爲

子貢故里

少孔子三十一歲天資穎悟善爲說辭孔子

嘗誦其辯齊景公問子貢曰子何師對曰魯仲尼

曰仲尼賢乎曰聖人也豈直賢哉景公曰其聖何

如子貢曰不知也景公作色曰始言聖人今言不

知何也子貢曰賜終身戴天不知天之高也終身

踐地不如地之厚也賜之事仲尼譬如渴操壺杓

就江海而飲之腹滿而去又安知江海之深乎景

公曰子得無太譽乎子貢曰賜何敢譽尚慮不及

耳賜譽仲尼譬猶兩手捧土而附泰山其無益亦明矣使不譽仲尼譬猶兩手握泰山無損亦明矣景公曰善哉豈其然乎曾哀公問於孔子曰子從父命孝乎臣從君命貞乎三問孔子不對孔子趨出以語子貢曰君問丘曰子從父命孝乎臣從君命貞乎三問而丘不對賜以爲何如子貢曰子從父命孝矣臣從君命貞矣奚疑焉孔子曰賜不識也昔者明王萬乘之國有爭臣七人則主無過舉千乘之國有爭臣五人則社稷不危百乘之家有爭臣三人則祿位不替父有爭子不陷無禮士有

爭友不行不義故子從父命奚詎爲孝臣從君命
奚詎爲貞夫能審其所從之謂孝之謂貞矣子貢
問於孔子曰今之人臣孰爲最賢孔子曰吾未識
也往者齊有鮑叔鄭有子皮則賢者矣子貢曰然
則齊無管仲鄭無子產乎子曰賜汝聞用力爲賢
乎進賢爲賢乎子貢曰進賢賢哉子曰然吾聞鮑
叔進管仲子皮達子產未聞二子之達賢已之才
者也子貢問曰昔者齊君問政夫子曰政在節財
魯君問政夫子曰政在論臣葉公問政子曰政在
悅近而來遠三者之間一也而夫子應之不同然

則政異端乎孔子曰各因其事也齊君爲國奢乎
臺榭淫乎苑囿五官妓樂不懈於時一旦而賜人
以千金之家者三故曰政在節財魯君有臣三人
內比周以愚其君外拒諸侯之賓以蔽其明故曰
政在諭臣夫荆其地廣而其都狹民有離心莫安
其居故曰政在悅近而來遠此三者所以爲政殊
矣子貢爲信陽宰將行辭于孔子孔子曰勤之慎
之奉天之時無奪無伐無暴無盜子貢曰賜也少
事君子豈以盜爲累哉孔子曰賜爾之未詳夫以
不肖伐賢是謂奪也以賢伐不肖是謂伐也緩其

今急其誅是謂暴也取人之善以自爲己是謂盜也盜非竊財之謂也吾聞之曰知爲吏者奉法以利民不知爲吏者枉法以侵民此怨之所由生也治官莫若平臨財莫若廉廉平之守不可改也匿人之善斯謂蔽賢揚人之惡斯爲小人內不相訓而外相謗非親睦也言人之善若己有之言人之惡若己受之故君子無所不慎焉子貢好廢舉與時轉貨貲喜揚人之美不能匿人之過嘗相魯衛家累千金卒終于齊唐元宗開元二十七年從祀封黎侯宋真宗大中祥符二年封黎陽公度宗咸

淳三年改封黎公

國朝嘉靖九年改稱先賢端木子

按左傳載越滅吳在魯哀公二十一年是時孔子夢奠已五年安得有吳亡越霸之語蘇子由亦曰子觀左傳齊之伐魯本於悼公之怒季姬而非田常吳之伐齊本怒悼公之反覆而非子貢凡太史公所記孔子使子貢一出存魯亂齊破吳強晉伯越皆非也是乃戰國策士之流假托依附以自爲名耳豈其然乎史記詳其文辭洵美可觀不敢具載

先賢冉子

冉求字子有山東兗州府人仲弓之宗族少孔子二十九歲嘗問於孔子曰古者三皇五帝不用五刑信乎孔子曰聖人之設防貴其不犯也制五刑而不用所以致治也凡夫人之爲姦邪竊盜靡法妄行者生于不足不足生于無度是以上有制度則民知所止民知所止則不犯故雖有姦邪賊盜靡法妄行之獄而無陷刑之民爲季氏宰齊師伐魯及清冉求謂季康子曰當子之身齊人伐魯而不能戰大不列于諸侯矣康子命冉有帥師禦之

孟武伯帥右師顏羽御邴洩爲右冉求帥左師管
用父御樊遲爲左及齊師戰于郊右師奔潰齊人
從之涉泗冉求用矛以帥衆遂入齊師獲甲首入
十齊師宵遁孔子聞之曰義也旣戰季孫謂冉有
曰子之於戰學之乎性之乎對曰學之孔子時孔
子在衛冉有言於季孫曰國有聖人而不能用欲
以求治猶郤行而求及前人也季孫以告哀公使
人以幣召孔子孔子自衛反魯季康子欲以田賦
使冉有訪諸仲尼仲尼不對私於冉有曰求來汝
不聞乎先王制土籍田以力而砥其遠邇賦里以

入而量其有無任力以夫而議其老幼於是乎有
鰥寡孤獨有軍旅之出則徵之無則已其歲收田
一井出稷禾秉芻缶米不是過也先王以爲足若
子季孫欲其法也則有周公之籍矣若欲犯法則
苟而行又何訪焉子貢曰恭老卹幼不忘賓旅好
學博藝省物而勤是冉求之行也唐玄宗開元二
十七年從祀贈徐侯宋真宗大中祥符二年封彭
城公度宗咸淳三年改封徐公

國朝嘉靖九年改稱先賢冉子

冉求墓在兗州府滕縣南三里柏塚社

...

...

...

...

...

...

...

...

...

...

先賢仲子

仲由字子路山東兗州府泗水縣人少孔子九歲
爲人果烈而剛直勇於行義初見夫子冠雄鷄冠
佩服豚拔劍而舞曰君子固以劍自衛乎夫子曰
君子忠以爲質仁以爲衛不出環堵之室而知千
里之外有不善則以忠化之侵暴則以仁固之何
待劍乎子路曰由乃今聞此言請攝齊以受教遂
儒服委質因門人請爲弟子孔子曰以子之所能
而加之以問學豈可及乎子路曰南山有竹不揉
自直斬而用之達於犀革以此言之何學之有子

曰括而羽之鏃而礪之其入之不亦深乎子路爲蒲大夫孔子過之入其境曰善哉由也恭敬以信矣入其邑曰善哉由也忠信以寬矣至其庭曰善哉由也明察以斷矣子貢執轡而問曰夫子未見由之政而三稱其善可得聞乎夫子曰吾見其政矣入其境田疇盡易草萊盡闢溝洫深治此其恭敬以信故其民盡力也入其邑墻屋完固樹木甚茂此其忠信以寬故其民不偷也至其庭庭甚清雅諸下用命此其明察以斷故其政不擾也雖三稱其善庸盡其美乎子路見於夫子曰負重涉遠

不擇地而休家貧親老不擇祿而仕昔者由也事
二親之時嘗食藜藿之食爲親負米百里之外親
沒之後南遊於楚從車百乘積粟萬鍾願欲食藜
藿爲親負米不可得也夫子曰由也事親可謂生
事盡力死事盡思者也卒年六十三歲遇衛難夫
子哭於中庭嘗曰自吾得由惡言不入於耳子貢
曰不畏強禦不侮矜寡其言循性其都以富材任
治戎是仲由之行也唐開元二十七年八月贈衛
侯宋真宗大中祥符二年改封河內侯度宗咸淳
三年進封衛公

國朝嘉靖九年改稱先賢仲子

仲子廟在泗水縣東廓萬曆十九年知縣譚好善

荆建

子路墓

有三

一在北直大各府開州北二十里

一在長垣縣北三里

一在清豐縣西南三十里

不詳此而村家貧賤孝不詳顯而其苦亦由也

先賢言子

言偃字子游南直蘇州府常熟縣人少孔子四十
五歲自吳之魯受學於孔子以文學著名夫子閑
居子游問禮夫子告以郊社禘嘗饋奠社饗之禮
游退而學禮每侍夫子輒以禮聖門號爲習於禮
者季康子謂子游曰仁者愛人乎曰然人亦愛之
乎曰然季康子曰鄭子產死鄭之人丈夫捨玦珮
婦人捨珠珥巷哭三月不聞竽瑟之聲仲尼之死
吾不聞魯國之愛之若是何也子游曰子產之於
夫子其猶浸水之與天雨乎浸水所及人得而知

之也天雨所及人不得而知之也嘗宰武城以禮
樂教民夫子喜而稱之子貢曰先成其慮及事而
用之故動則不妄是言偃之行也唐玄宗開元二
十七年贈吳侯宋真宗大中祥符二年封丹陽公
度宗咸淳三年改封吳公

國朝嘉靖九年改稱先賢言子

子游廟在山東東昌府武城縣西十里邑人歲時

祀焉

吳公祠在常熟縣學宋慶元間知縣孫應時建朱
文公爲記洪武初重修有司春秋次丁日致祭

子游祠在山東兗州府費縣西南八十里武城東
關陽川嘉靖二十五年總理漕河都御史周用
檄建

弦歌書院在山東武城縣治南子游仕魯爲武城
宰其治故立書院祀之舊在縣西四十里元泰
定徙此

學道書院在蘇州府長洲縣學南宋咸淳間建以
教言氏子孫元廢

文學書院在常熟縣西元至順間建置置山長本
朝遷縣治東北改名學道書院

言偃宅在常熟縣西北子游巷文學橋而舊井存

焉

言偃字季野魯國武城人孔子弟子也

子游字子游魯國武城人孔子弟子也

子夏字子綰魯國武城人孔子弟子也

子張

字子石魯國武城人孔子弟子也

子貢字子貢魯國武城人孔子弟子也

子路字子路魯國武城人孔子弟子也

子思

字子思魯國武城人孔子弟子也

子羽字子羽魯國武城人孔子弟子也

子柳字子柳魯國武城人孔子弟子也

子旗字子旗魯國武城人孔子弟子也

先賢卜子

卜商字子夏河南懷慶府溫縣人少孔子四十四歲家貧衣若縣鶉或曰子何不仕曰諸侯之驕我者吾不爲臣大夫之驕我者吾不復見柳下惠與後門者同衣而不見疑非一日之間也及見曾子曾子曰何肥也子夏曰吾入見先王之義則榮之出見富貴又榮之兩者未知勝負故癯今先生之義勝故肥是以志之難也夫子讀易至于損益喟然而嘆子夏避席問曰夫子何嘆焉孔子曰夫自損者必有益之自益者必有損之吾是以嘆也子

夏曰然則學者不可以益乎子曰非道益之謂也
道彌益而身彌損夫學者損其自多以虛受人故
能成其滿博也天道成而必變凡持滿而能久者
未嘗有也故曰自賢者天下之善言不得聞於耳
矣子夏曰商請志之而終身奉行焉子夏問曰商
聞易云生人及萬物鳥獸昆蟲各有竒偶氣分不
同而凡人莫知其情惟達道德者能原本焉天一
地二人三三三爲九九九八十一一主日日數十
故人十月而生八九七十二偶以成竒主辰辰爲
月月主馬故馬十二月而生七九六十三三主斗

斗主狗故狗三月而生六九五十四四主時時主
豕故豕四月而生五九四十五五爲音音主猿故
猿五月而生四九三十六六主律律主鹿故鹿六
月而生三九二十七七主星星主虎故虎七月而
生二九一十八八主風風主蟲故蟲八日而化其
餘各從其類矣鳥魚生於陰而屬陽故皆卵生齧
石者入竅而卵生齧嚼者九竅而胎生日生者類
父夜生者類母敢問其皆然乎孔子曰然吾聞諸
老聃亦如子之言也子夏問顏回之爲人奚若孔
子曰回之仁賢於丘也曰子貢之爲人奚若孔子

曰賜之辯賢於丘也曰子路之爲人奚若孔子曰由之勇賢於丘也曰子張之爲人奚若孔子曰師之莊賢於丘也子夏曰然則四子何爲事夫子孔子曰居吾語女夫回能仁而不能反賜能辯而不能訥由能勇而不能怯師能莊而不能同兼四子之有以易吾吾弗許也此其所以事吾而不二也魯哀公問子夏曰五帝有師乎子夏曰有商聞黃帝學乎太皞顓頊學乎綠圖帝嚳學乎赤松子堯學乎尹壽舜學乎務成跼禹學乎西王國湯學乎威子伯文王學乎鮫時子斯武王學乎郭叔周公

學乎太公吾夫子學乎老聃此雖聖人亦必有師也孔子嘗曰吾死之後商也日益賜也日損曾子曰何謂也子曰商也好與賢已者處賜也好悅不若已者處不知其子視其父不知其人視其友不知其君視其所使不知其地視其草木故曰與善人居如入芝蘭之室久而不聞其香卽與之化矣與不善人居如入鮑魚之肆久而不聞其臭亦與之俱化矣孔子沒子夏居西河教授爲魏文侯師好論精微時人無以尚之序詩傳易稽古志禮子貢曰送迎必敬上交下接若截焉是卜商之行也

唐太宗貞觀二年從祀玄宗開元二十七年封魏侯宋真宗大中祥符二年加封河東公度宗咸淳三年改封魏公

國朝嘉靖九年改稱先賢卜子

子夏廟在山西太原府文水縣西南二十五里卽當時退居河西之地

卜商祠在山西汾州府城北四十里謁泉山下

子夏墓

有二

一在山東兗州府曹州西三十里卜堦都

一在山西平陽府河津縣西五里新豐村

先賢顓孫子

顓孫師字子張河南開封府陳州人少孔子四十八歲子張問入官於孔子孔子曰安身取譽爲難子張曰爲之何如子曰已有善勿專教不能勿怠已過勿發失言勿倚不善勿遂行事勿留君子入官自此六者則身心譽至而政從矣古者聖主冕而前旒所以蔽明也統統充耳所以掩聰也水至清則無魚人至察則無徒枉而直之使自得之優而柔之使自求之揆而度之使自索之民有小罪必求其善以赦其過民有大罪必厚其故以仁輔

聖門志 卷一 十一
化如有死罪其使之生則善也是以上下親而不
離道化流而不蘊此治民之至道矣入官之大統
矣子張見魯哀公七日而哀公不禮託僕夫而去
曰臣聞君好士故不遠千里以見七日而君不禮
君之好士有似葉公子高之好龍也葉公好龍鈎
鑿屋室雕文咸寫龍於是天龍聞而下焉葉公見
之棄而還走失其魂魄五色無主是葉公非好龍
也好夫似龍而非龍者也今師聞君好士不遠千
里以見君乃七日不禮是非好士也好夫似士而
非士者也敢託而去孔子卦得賁喟然而嘆子張

進而問曰師聞賁吉卦而嘆之乎夫子曰賁非正
色是以嘆之吾思夫質素白當正白黑當正黑夫
質文何也吾聞丹漆不文白玉不雕寶珠不飾何
也質有餘者不更飾也蓋因其文勝而默救之也
子張病召申祥而語之曰君子曰終小人曰死吾
今日其庶幾乎子貢曰美功不伐貴位不喜不侮
不佚不傲無告是顓孫師之行也夫子曰其不伐
則猶可能其不侮百姓則仁也及死公明儀爲志
焉唐玄宗開元二十七年從祀封陳伯宋真宗大
中祥符二年封宛丘侯徽宗政和元年改封潁川

公 侯度宗咸淳三年加封陳國公升十哲位尋稱陳

國朝嘉靖九年改稱先賢顓孫子

子張墓在南直徐州蕭縣南三十五里堀坊村西

今日其墓遺址尚存其地不詳其地不詳其地不詳

此碑係明初所刻其文曰蘇子曰蘇子曰蘇子曰蘇子

也其碑係明初所刻其文曰蘇子曰蘇子曰蘇子曰蘇子

其文曰蘇子曰蘇子曰蘇子曰蘇子曰蘇子曰蘇子

其文曰蘇子曰蘇子曰蘇子曰蘇子曰蘇子曰蘇子

其文曰蘇子曰蘇子曰蘇子曰蘇子曰蘇子曰蘇子

先賢六十二人

山東 碭十 河南 十二
陝西 三 湖廣 二

東廡

澹臺滅明

山東兗州府費縣人

原

憲

河南歸德府商丘縣人

南宮适

山東兗州府人

商

瞿

山東兗州府曲阜縣人

漆雕開

河南汝寧府汝陽縣人

樊

須

山東兗州府人

公西赤

山東兗州府曲阜縣人

梁

鱣

山東兗州府人

冉孺

山東兗州府人

伯

虔

山東兗州府人

冉季

山東兗州府人

漆

雕

多

漆雕徒父

山東兗州府人

商

澤

山東兗州府人

任不齊

湖廣荊州府人

公

良

孺

奚容蒧 山東兗州府人

顏祖 山東兗州府曲阜縣人

句井疆 河南衛輝府人

秦商 山東兗州府人

公祖句茲 山東兗州府人

縣成 山東兗州府人

燕伋 山東兗州府人

顏之僕 山東兗州府曲阜縣人

樂欬 山東兗州府人

邾巽 山東兗州府人

公西輿如 山東兗州府人

公西蒧 山東兗州府人

陳亢 河南開封府陳州人

琴張 河南衛輝府人

步叔乘 山東青州府人

西廡

宓不齊 山東兗州府曲阜縣人

公冶長 山東青州府諸城縣人

公替哀

山東濟南府人

高柴

河南衛輝府輝縣人

司馬耕

河南歸德府商丘縣人

有若

山東兗州府曲阜縣人

巫馬期

河南開封府陳州人

顏辛

山東兗州府曲阜縣人

曹邨

河南汝寧府人

公孫龍

湖廣荊州府人

秦祖

陝西西安府人

顏高

山東兗州府曲阜縣人

壤駟赤

陝西西安府人

石作蜀

陝西鞏昌府人

公夏首

山東兗州府人

后處

山東青州府人

公肩定

山東兗州府人

鄒單

山東東昌府聊城縣人

罕父黑

山東兗州府人

榮旂

山東兗州府人

左人郢

山東兗州府人

鄭國

山東兗州府人

原亢

山東兗州府人

廉潔

河南衛輝府人

叔仲會

山東兗州府人

狄黑

河南衛輝府人

孔忠

山東兗州府曲阜縣人

施之常

山東兗州府人

秦非

山東兗州府人

申棖

山東兗州府人

顏噲

山東兗州府曲阜縣人

公孫景

山東兗州府人

高崇

山東兗州府人

先賢澹臺子 東廡一

澹臺滅明字子羽山東兗州府費縣人

或曰今北直河間府

故城縣西南四十里澹村爲滅明之故居

少孔子三十九歲狀貌甚惡

夫子以爲材簿旣受業退而修行南游至江從弟

子三百人設取予去就名施於諸侯孔子聞之曰

相馬以輿相士以居弗可廢矣吾以貌取人失之

子羽子貢曰貴之不喜賤之不怒苟利於民廉於

行已其事上也以佑其下是澹臺滅明之行也今

蘇州府南一十八里有澹臺湖豫章進賢縣有進

賢門皆其南游遺跡唐元宗開元二十七年封江

聖門志 卷一
伯宋真宗咸平三年封金鄉侯

國朝嘉靖九年改稱先賢澹臺子

澹臺滅明祠

有二

一在兗州府曹縣東三十里龍頭岡

一在費縣西南七十里

澹臺滅明墓

有四

一在費縣東北三十里

一在江西南昌府城內東湖上總持院後

一在河南開封府陳留縣北六十里

一在兗州府鄒縣西北三十里

先賢宓子

西廡一

宓不齊字子賤山東兗州府曲阜縣人少孔子四十九歲爲單父宰辭於夫子夫子曰毋迎而距毋望而許許之則失守距之則閉塞譬如高山深淵仰之不可極度之不可測也子賤曰善敢不承命乎子賤爲人仁愛有才智百姓不忍欺身不下堂鳴琴而治及齊攻魯單父父老請縱民穫麥子賤不聽曰若使不耕者得穫是使民樂有寇也三年孔子使巫馬期遠觀政焉巫馬期衣敝裘入單父界見漁者得魚輒舍之巫馬期問焉漁者曰魚之

大者名爲鱗吾大夫愛之其小者名爲鱣吾大夫
欲長之是以得二者輒舍之巫馬期返以告孔子
曰宓子之德至使民間行若有嚴刑於旁敢問宓
子何行而得於是孔子曰吾嘗與之言曰誠於此
者形乎彼宓子行此術於單父也孔子嘗謂之曰
子治單父衆悅子何施而得之也對曰不齊父其
父子其子恤諸孤而哀喪紀孔子曰是小民附矣
猶未也曰不齊所父事者三人所兄事者五人所
友者十一人孔子曰父事三人可以教孝矣兄事
五人可以教弟矣友十一人可以教學矣是士附

也猶未也曰此地有賢於不齊者五人不齊師之而稟度焉孔子曰昔堯舜聽天下務求賢以自輔夫賢者百夫之宗也神明之主也惜乎不齊之所治者邑也時孔子之兄子蔑與子賤皆仕孔子過蔑而問焉曰自子之仕何得何亡孔蔑曰未有所得而所亡者三王事若襲學焉得習是學不得明也俸祿少饘粥不及親戚是親戚益疏也公事多急不得吊死問疾是朋友益疏也孔子不悅徃過子賤問如孔蔑子賤曰未有所亡而所得者三始誦之文今得行之是學益明也俸祿雖少得及親

聖門志 卷一 三
戚是親戚益親也公事雖急夜勤吊死視病是朋
友益篤也孔子以君子稱之子賤著宓子十六篇
唐玄宗開元二十七年封單父伯從祀宋真宗咸
平三年加封單父侯

國朝嘉靖九年改稱先賢宓子

子賤墓在南直鳳陽府壽州南六十里鐵佛岡舊
有碑云子賤爲魯使吳死於道因葬焉

先賢原子 東廬二

原憲字子思河南歸德府商丘縣人少孔子三十
六歲清靜守節貧而樂道孔子爲魯司寇憲嘗爲
之宰孔子卒退隱於衛居環堵之室茨以生蒿蓬
戶甕牖桷桑而無樞上漏下濕匡坐而絃歌子貢
相衛乘肥馬衣輕裘中紺而表素軒不容巷而往
見之原憲楮冠藜杖而應門正冠則纓絕振襟則
肘見納履則踵決子貢曰嘻先生何病也憲曰吾
聞之無財之謂貧學道而不能行者謂之病若憲
貧也非病也若夫希世而行比周而友學以爲人

教以爲已仁義之匿車馬之飾衣裘之麗憲不忍
爲之也原憲曳杖拖履行歌商頌而返聲滿天地
如出金石子貢慚不懌而去終身耻其言之過也
唐玄宗開元二十七年封原伯宋真宗咸平三年
封任城侯

國朝嘉靖九年改稱先賢原子

原憲墓在山東兗州府費縣西北一百二十五里
其旁有原憲城俗呼爲原憲屯

先賢原子

東燕二

先賢公冶子

西廡二

公冶長字子長山東青州府諸城縣人孔子之婿也嘗陷於繆綈夫子謂非罪唐玄宗開元二十七年追封莒伯宋真宗咸平三年加封高密侯國朝嘉靖九年改稱先賢公冶子

按匡章非孟子遂爲不孝之子公冶長非孔子遂爲有罪之人噫天下之不遇聖賢者亦衆矣

公冶長墓

有二

一在諸城縣西四十里

一在南直淮安府境

...

...

...

...

...

...

...

...

...

...

武賀公存子

...

先賢南宮子

東廡三

南宮适字子容山東兗州府人魯孟僖子之子居南宮因姓焉又曰南宮敬叔哀公三年五月辛卯司鐸火踰公宮桓僖宮災抹火者皆曰顧府敬叔至命周人出御書俟於宮故子服景伯遂命宰人出禮書故周禮在魯而典籍尚存者敬叔之功爲多也魯繆公時辛寬見公曰臣今而後知吾先君周公之不若太公望之知也昔者太公望封於營丘之渚海阻山高險固之地也是故地日廣子孫彌隆吾先君周公封於魯無山林谿谷之險諸侯

四面以達是故地日削子孫彌衰辛寬出南宮适
入見公曰今者寬也非周公其辭若是也适對曰
寬弗識也君獨不聞成王之定成周之說乎其辭
曰唯予一人營居於成周有善易得而見也有不
善易得而誅也故曰善者得之不善者失之古之
道也夫賢者豈欲其子孫阻山海之險長爲無道
哉小人哉寬也今使燕雀爲鴻鵠鳳凰慮則必不
得矣孔子以兄子妻之唐玄宗開元二十七年封
鄒伯宋真宗咸平三年封襲丘侯改封汝陽
國朝嘉靖九年改稱先賢南宮子

先賢公皙子

西廡三

公皙哀字季沉山東濟南府人時天下多仕於大夫爲家臣季沉鄙之未嘗屈節爲人臣孔子賢之太史公曰季沉原憲讀書懷獨行君子之德義不苟合當世終身空室蓬戶褐衣蔬食不厭死而已四百餘年而弟子志之不倦此可以知其賢矣唐玄宗開元二十七年封鄉伯從祀宋真宗咸平三年加封北海侯

國朝嘉靖九年改稱先賢公皙子

國陣嘉許大平受無去賢公晉于

子臨林其意如

遠宗開示二十小字性服所與甄宋與宗規平江

四百餘字而種下志之不制此何以快其賢矣惠

通合當世效良少望其教以醫文強食不無亦而日

太史公曰李氏孤弱無善對調行在士之新舊不

大為宗克李氏補之未嘗風消為入若五千賢之

公賢其字李氏山東濟南府人耕天不食其飲大

式賢公晉

西燕三

先賢商子

東廡四

商瞿字子木山東兗州府曲阜縣人少孔子二十九歲瞿好易夫子傳之嘗爲孔子筮曰子有聖智而無位夫子泣曰天也命也鳳鳥不來河無圖至嗚呼天命之也瞿傳楚人馯臂子弘弘傳江東人矯子庸疵疵傳燕人周子家豎豎傳淳于人光子乘羽羽傳齊人田子莊何及秦禁學易爲筮卜之書獨不禁故傳受者不絕也漢興田何傳之訖于宣元有施孟梁丘京氏列學官語具漢書唐玄宗開元二十七年封蒙伯從祀宋真宗咸平三年加

封須昌侯

國朝嘉靖九年改稱先賢商子

謂其善書魯文宗

書則不禁其制又書不難也其與田何制文端于

宋其制制有人田子其何又秦禁學急於禁小之

獻于制制制人制于宋望望制制于八出子

制于天命之也聖制制人制制于以制制也東人

制制制制于立口天也命也風也制制不來制制圖至

制制制制制制制制制制制制制制制制制制制制制

制制制制制制制制制制制制制制制制制制制制制

大賢商子

東燕四

先賢高子

西廡四

高柴字子羔河南衛輝府輝縣人齊敬仲高傒十代孫也少孔子三十歲爲人篤孝而有法自見夫子未嘗越禮仕衛爲士師嘗別人之足及出公之難子羔出走郭門別者守門焉謂子羔曰彼有缺子羔曰君子不踰又曰彼有竇子羔曰君子不隧又曰於此有室子羔乃入焉旣而追者罷子羔將出謂別者曰吾不能虧主之法而別子之足今吾在難正子報怨之時而迓我者三何哉別者曰斷足固吾之罪昔公之治我以法臨當論刑若愀然

不悅君非私我也天生君子其道固然此臣之所
以悅君也孔子聞之曰爲吏用法一也思仁恕則
樹德加嚴暴則樹怨公以行之其柴乎唐玄宗開
元二十七年封共城伯從祀宋真宗咸平三年封
共成侯

國朝嘉靖九年改稱先賢高子

高柴墓

有四

一在山東兗州府沂州西南一百三十

里故蘭陵城北一在河南開封府太康縣西北
四十里一在兗州府東阿縣清水河寺西一里

一在兗州府陽穀縣

先賢漆雕子

東廡五

漆雕開字子若河南汝寧府汝陽縣人少孔子十
一歲習尚書不樂仕孔子問日子事臧文仲武仲
及孺子容此三大夫孰賢對曰臧氏家有守龜焉
名曰蔡文仲三年而爲一兆武仲三年而爲二兆
孺子容三年而爲三兆從此見之若問三人之賢
與不賢未敢識也孔子曰君子哉漆雕氏之子其
言人之美也隱而顯其言之過也微而著智而
不能及明而不能見孰克如此程子稱其已見大
意唐玄宗開元二十七年封滕伯從祀宋真宗咸

平三年加封平輿侯

國朝嘉靖九年改稱先賢漆雕子

言人之賢也

與不賢未幾

歸年谷三平

各曰發文中

又曰

一

各

式

先賢司馬子

西廡五

司馬耕字子牛河南歸德府商丘縣人向魑之弟也自宋來學爲人性躁見兄桓魋行惡牛嘗憂之魯哀公十四年向魑作亂入於曹以叛宋景公使左師向巢伐之巢不能克魋奔衛牛致其邑與珪焉而適齊魋自衛入齊陳成子使爲次卿牛又致其邑而適吳吳人惡之而反趙簡子陳成子皆召之卒於魯郭門之外阮氏葬諸丘輿唐玄宗開元二十七年封向伯從祀宋真宗咸平三年加封楚丘侯徽宗改封綏陽侯

聖門志 卷一 三十三
國朝嘉靖九年改稱先賢司馬子

司馬牛墓在山東兗州府費縣西南八十里南成

山魯哀公十四年葬此葬諸立與專之宗開元

其邑而處吳吳人惡之而又欲簡子刺死子皆曰

無而商齊鯀自南人齊刺死子刺為大噉牛又姓

去禍向巢封之巢不指京鯀奔南牛疑其邑與封

魯哀公十四年向鯀葬南人以曹以故宋景公朝

也自宋來學魯人封鯀其邑而鯀亦惡牛嘗憂之

同鯀耕字子牛南鯀為南立鯀人向鯀之法

共贊同鯀子

西無正

先賢樊子

東廡六

樊須字子遲山東兗州府人樊皮之後少孔子三十六歲仕於季氏魯哀公十一年齊伐魯及清武叔蒐乘冉求帥左師樊遲爲右季孫曰須也弱冉求曰年雖少能用命焉師及齊師戰於郊齊師自稷曲師不踰溝樊遲曰非不能也不信予也請三刻而踰之如之衆從之師入齊軍獲甲首八十齊人遁唐玄宗開元二十七年封樊伯從祀宋真宗咸平三年封益都侯

國朝嘉靖九年改稱先賢樊子

先賢有子

西廡六

有若字子有山東兗州府曲阜縣人少孔子四十
 三歲爲人疆識明習好古孔子旣沒群弟子欲以
 師事之唐玄宗開元二十七年追封沐伯從祀宋
 真宗咸平三年加封平陰侯
 國朝嘉靖九年改稱先賢有子

十六歲出外季及魯公十一平齊外魯又肅
 樊齊字子戡山東齊州人樊文之弟少孔子三

先賢樊子

東廡六

先賢公西子

東廡七

公西赤字子華山東兗州府曲阜縣人少孔子四十二歲習於禮容應對夫子曰二三子之欲學賓客之禮者其於赤也至觀其於養親則若與朋友處然恩勝禮也夫子之喪公西赤掌殯葬焉子貢曰齋莊而能肅志通而好禮擯相兩君之事篤雅有節是公西赤之行也唐玄宗開元二十七年追封郕伯宋真宗咸平三年加封鉅野侯國朝嘉靖九年改稱先賢公西子

聖門志 卷一
先賢巫馬子

西廡七

巫馬施字子期河南開封府陳州人少孔子三十
歲爲魯單父宰戴星而出戴星而入日夜不處而
單父治期間於子賤曰子鳴琴而單父治一不見
其勞何也子賤曰我任人子任力任人者佚任力
者勞期日是施之未至也唐玄宗開元二十七年
封鄆伯從祀宋真宗咸平三年加封東阿侯
國朝嘉靖九年改稱先賢巫馬子

先賢公西子

先賢梁子

東廡八

梁鱸字叔魚山東兗州府人少孔子四十九歲唐
玄宗開元二十七年追封梁伯從祀宋真宗咸平
三年加封千乘侯
國朝嘉靖九年改稱先賢梁子

先賢顏子

西廡八

顏辛字子柳山東兗州府曲阜縣人少孔子四十
六歲唐玄宗開元二十七年追封蕭伯從祀宋真
宗咸平三年加封陽穀侯

國朝嘉靖九年改稱先賢顏子

先賢冉子 東廡九

冉孺字子魯山東兗州府人少孔子五十歲唐玄

宗開元二十七年追封紀伯從祀宋真宗咸平三

年加封臨沂侯

國朝嘉靖九年改稱先賢冉子

先賢曹子 西廡九

曹卹字子循河南汝寧府人少孔子五十歲唐玄

宗開元二十七年追封曹伯從祀宋真宗咸平三

年加封上蔡侯

國朝嘉靖九年改稱先賢曹子

先賢伯子

東廡十

伯虔字子析山東兗州府人少孔子五十歲唐玄宗開元二十七年追封聊伯從祀宋真宗咸平三年加封沐陽侯

國朝嘉靖九年改稱先賢伯子

先賢公孫子

西廡十

公孫龍字子石湖廣荊州府人少孔子五十三歲唐玄宗開元二十七年追封黃伯從祀宋真宗咸平三年加封枝江侯

國朝嘉靖九年改稱先賢公孫子

聖門志 卷一
先賢冉子

東廡十一

冉季字子產山東兗州府人唐玄宗開元二十七年追封東平伯從祀宋真宗咸平三年加封諸城侯

國朝嘉靖九年改稱先賢冉子

先賢秦子

西廡十一

秦祖字子南陝西西安府人唐玄宗開元二十七年追封少梁伯從祀宋真宗咸平三年加封鄆城侯
國朝嘉靖九年改稱先賢秦子

先賢漆雕子

東廡十二

漆雕哆字子歛山東兗州府人唐玄宗開元二十七年追封武城伯從祀宋真宗咸平三年加封濮陽侯

國朝嘉靖九年改稱先賢漆雕子

先賢顏子

西廡十二

顏高字子驕山東兗州府曲阜縣人少孔子五十五歲唐玄宗開元二十七年追封瑯琊伯從祀宋真宗咸平三年加封雷澤侯

國朝嘉靖九年改稱先賢顏子

先賢漆雕子 東廡十三

漆雕徒父字子有山東兗州府人唐玄宗開元二十七年追封須句伯從祀宋真宗咸平三年加封

高苑侯

國朝嘉靖九年改稱先賢漆雕子

先賢壤子 西廡十三

壤駟赤字子徒陝西西安府人唐玄宗開元二十七年追封北徵伯從祀宋真宗咸平三年加封上

邽侯

國朝嘉靖九年改稱先賢壤子

按通志畧壤駟氏複姓

先賢商子 東廡十四

商澤字子秀山東兗州府人唐玄宗開元二十七年追封睢陽伯從祀宋真宗咸平三年加封鄒平侯

國朝嘉靖九年改稱先賢商子

先賢石子 西廡十四

石作蜀字子明陝西鞏昌府人唐玄宗開元二十七年追封郿邑伯從祀宋真宗咸平三年加封成紀侯

國朝嘉靖九年改稱先賢石子

按氏族畧石作氏
複姓當作石作子

聖門志 卷一
先賢任子 東廡十五

任不齊字子選湖廣荊州府人唐玄宗開元二十
七年追封任城伯從祀宋真宗咸平三年加封當
陽侯

國朝嘉靖九年改稱先賢任子

先賢公夏子 西廡十五

公夏首字子乘山東兗州府人唐玄宗開元二十
七年追封元父伯從祀宋真宗咸平三年加封鉅
平侯

國朝嘉靖九年改稱先賢公夏子

先賢公子

東廡十六

公良孺字子正河南開封府陳州人賢而有勇孔子周行常以家車五乘從唐玄宗開元二十七年追封東牟伯從祀宋真宗咸平三年加封牟平伯國朝嘉靖九年改稱先賢公子

先賢后子

西廡十六

后處字子里山東青州府人唐玄宗開元二十七年追封營丘伯從祀宋真宗咸平三年加封膠東侯

國朝嘉靖九年改稱先賢后子

先賢奚子 東廡十七

奚容蒧字子哲山東兗州府人唐玄宗開元二十七年追封下邳伯從祀宋真宗咸平三年加封濟

陽侯

國朝嘉靖九年改稱先賢奚子 按氏族大全奚奚仲之後以名爲氏

先賢公子 西廡十七

公肩定字子中山東兗州府人唐玄宗開元二十七年追封新田伯從祀宋真宗咸平三年加封梁

父侯

國朝嘉靖九年改稱先賢公子

先賢顏子

東廡十八

顏祖字子襄山東兗州府曲阜縣人唐玄宗開元二十七年追封臨邑伯從祀宋真宗咸平三年加封富陽侯

國朝嘉靖九年改稱先賢顏子

先賢鄒子

西廡十八

鄒單字子家山東東昌府聊城縣人唐玄宗開元二十七年追封銅鞮伯從祀宋真宗咸平三年加封聊城侯

國朝嘉靖九年改稱先賢鄒子

先賢句子 東廡十九

句井疆字子疆河南衛輝府人唐玄宗開元二十

七年追封淇陽伯從祀宋真宗咸平三年加封滏

陽侯

國朝嘉靖九年改稱先賢句子

先賢罕父子 西廡十九

罕父黑字子索山東兗州府人唐玄宗開元二十

七年追封乘丘伯從祀宋真宗咸平三年加封祁

鄉侯

國朝嘉靖九年改稱先賢罕父子

氏族略無罕父氏止有罕父氏

先賢秦子

東廡二十

秦商字子丕山東兗州府人少孔子四歲唐玄宗
開元二十七年追封上洛伯從祀宋真宗咸平三
年加封鄆城伯

國朝嘉靖九年改稱先賢秦子

先賢榮子

西廡二十

榮旂字子祺山東兗州府人唐玄宗開元二十七
年追封雩婁伯從祀宋真宗咸平三年加封厭次
侯

國朝嘉靖九年改稱先賢榮子

聖門志 卷一 十一
先賢公祖子

東廡二十一

公祖句茲字子之山東兗州府人唐玄宗開元二
十七年追封期思伯從祀宋真宗咸平三年加封
卽墨侯

國朝嘉靖九年改稱先賢公祖子

先賢左子

西廡二十一

左人郢字行山東兗州府人唐玄宗開元二十七
年追封臨淄伯從祀宋真宗咸平三年封南華侯
國朝嘉靖九年改稱先賢左子

按通志畧左人以官爲姓也如

封人雍人之類
今稱左子似誤

先賢縣子

東廡二十二

縣成字子橫山東兗州府人唐玄宗開元二十七年追封鉅野伯從祀宋真宗咸平三年加封武城侯

國朝嘉靖九年改稱先賢縣子

先賢鄭子

西廡二十二

鄭國字子徒

聖里志作薛邦

山東兗州府人唐玄宗開元

二十七年追封滎陽伯從祀宋真宗咸平三年加

封胸山侯

國朝嘉靖九年改稱先賢鄭子

先賢燕子

東廡二十三

燕伋字思山東兗州府人一作秦人唐玄宗開元二十七年追封漁陽伯從祀宋真宗咸平三年加封汧源侯

國朝嘉靖九年改稱先賢燕子

先賢原子

西廡二十三

原亢字子籍山東兗州府人唐玄宗開元二十七年追封萊蕪伯從祀宋真宗咸平三年加封樂平侯

國朝嘉靖九年改稱先賢原子

先賢顏子

東廡二十四

顏之僕字子叔山東兗州府曲阜縣人唐玄宗開元二十七年追封東武伯從祀宋真宗咸平三年加封死句侯

國朝嘉靖九年改稱先賢顏子

先賢廉子

西廡二十四

廉潔字子曹河南衛輝府人唐玄宗開元二十七年追封莒父伯從祀宋真宗咸平三年加封胙城侯

國朝嘉靖九年改稱先賢廉子

先賢樂子 東廡二十五

樂欬字子聲山東兗州府人唐玄宗開元二十七年追封昌平伯從祀宋真宗咸平三年加封建成侯

國朝嘉靖九年改稱先賢樂子

先賢叔仲子 西廡二十五

叔仲會字子期山東兗州府人少孔子五十歲與孔璇年相比二孺子俱執筆記事迭侍於夫子唐玄宗開元二十七年追封瑕 丘伯從祀宋真宗咸平三年加封博平侯

國朝嘉靖九年改稱先賢叔仲子

先賢邾子

東廡二十六

邾巽字子歛山東兗州府人唐玄宗開元二十七年追封平陸伯從祀宋真宗咸平三年加封高唐侯

國朝嘉靖九年改稱先賢邾子

先賢狄子

西廡二十六

狄黑字皙之河南衛輝府人唐玄宗開元二十七年追封臨濟伯從祀宋真宗咸平三年加封林慮侯

國朝嘉靖九年改稱先賢狄子

先賢公西子

東廡二十七

公西輿如字子上山東兗州府人唐玄宗開元二十七年追封重丘伯從祀宋真宗咸平三年加封臨胸侯

國朝嘉靖九年改稱先賢公西子

先賢子蒧子

西廡二十七

孔忠字子蒧孔子兄孟皮之子唐玄宗開元二十七年追封汶陽伯從祀宋真宗咸平三年加封鄆城侯

國朝嘉靖九年改稱先賢子蒧子

先賢公西子

東廡二十八

公西葳字子尚山東兗州府人唐玄宗開元二十
七年追封祝阿伯從祀宋真宗咸平三年加封徐
城侯

國朝嘉靖九年改稱先賢公西子

先賢施子

西廡二十八

施之常字子常山東兗州府人唐玄宗開元二十
七年追封乘氏伯從祀宋真宗咸平三年加封臨
濮侯

國朝嘉靖九年改稱先賢施子

先賢陳子

東廡二十九

陳亢字子禽河南開封府陳州人少孔子四十歲

唐玄宗開元二十七年追封穎伯從祀宋真宗咸

平三年加封南穎侯

國朝嘉靖九年改稱先賢陳子

墓在開封府太康縣北二十里

先賢秦子

西廡二十九

秦非字子之山東兗州府人唐玄宗開元二十一

年追封汧陽伯從祀宋真宗咸平三年加封華亭

侯

國朝嘉靖九年改稱先賢秦子

先賢琴子

東廡三十

琴張字子開河南衛輝府人唐玄宗開元二十七年追封南陵伯與琴牢並從祀宋真宗大中祥符中以重祀去牢存張加封頓丘侯徽宗

政和中改封陽平侯

國朝嘉靖九年改稱先賢琴子

先賢申子

西廡三十

申枏字子周山東兗州府人家語作申續史記作申黨其實一也唐玄宗開元二十七年追封枏魯伯黨邵陵伯並從祀宋真宗咸平

三年加封枏文登侯黨淄川侯

國朝嘉靖九年以重名去黨存枏改稱先賢申子

先賢步子

東廡三十一

步叔藥字子車山東青州府人唐玄宗開元二十
七年追封淳干伯從祀宋真宗咸平三年加封博
昌侯

國朝嘉靖九年改稱先賢步子

先賢顏子

西廡三十一

顏曾字子聲山東兗州府曲阜縣人唐玄宗開元
二十七年追封朱虛伯從祀宋真宗咸平三年加
封濟陰侯

國朝嘉靖九年改稱先賢顏子

按孔子立三學堂以訓九國之人於九國之中教化三千弟子與七十二士也其三學堂一曰西河一曰洙泗一曰鄒邑其九國吳衛蔡宋齊魯晉鄭陳是也一云三堂俱在魯國一云西河堂在河東去雍州二十里